

**ՍՏԵՓԱՆ ՈՍԿԱՆՅԱՆԻ ԾԱԾԿԱՆՈՒՆԵՐԸ
«ԱՐՇԱԼՈՒՅՍ ԱՐԱՐԱՏՅԱՆ» ՊԱՐԲԵՐԱԿԱՆՈՒՄ**

Ա. Ա. ԽԱՌԱՏՅԱՆ

Զմյուռնիայում «Ուսումնասեր» ընկերության գործունեության դադարումից հետո (1868) ականավոր հրապարակախոս և մանկավարժ Ստ. Ոսկանյանի հասարակական հայացքների մասին շատ քիչ բան է հայտնի. այն, որ «La Reforme»-ի¹ խմբագիրը հայ իրականությանն անդրադարձել է միայն Կոստանդյանի աշխատության դեմ գրած իր երկու գրքուկներով։ Վերջերս հայտնի դարձավ նաև, որ Ոսկանյանը 1883-ին Օրպել ծածկանունով աշխատակցել է «Արշալույս արարատյանին»²։

Սակայն, ինչպես փաստերն են հուշում, Ոսկանյանը «Արշալույս արարատյանում» հոդվածներով հանդես է եկել Օրպել ծածկանունով ստորագրելուց 12 տարի առաջ։

Հայտնի է, որ «Արևելք» և «Արևմուտք» հանդեսներում Ոսկանյանը գործածել է նաև Հրանտ ծածկանունը և ստորագրության եռաստղանիշ ձևը³։

«Արշալույս արարատյանի» էջերում ևս հանդիպում ենք Հրանտ ստորագրությամբ հինգ թղթակցության, որոնց ոճը հիշեցնում է Ստ. Ոսկանյանին⁴։ Այդ հոդվածներին անդրադառնալուց առաջ ավելացնենք, որ նույն տասնամյակի «Արշալույս արարատյանում» հանդիպում ենք եռաստղանիշ ստորագրությամբ երկու թղթակցության, որոնք ևս, մեր կարծիքով, պատկանում են Ստ. Ոսկանյանի գրչին⁵։

1 Դժբախտաբար, հայ բանասիրությանն առաջիմ անմատչելի են այդ թերթի համարները, որոնց ուսումնասիրությունը անգնահատելի կլիներ Ոսկանյանի 1868—1901 թթ. շրջանի գաղափարախոսությունը արժեքավորելու տեսակետից։ Այդ պարբերականի մասին բավականաչափ տեղեկություններ կան Զմյուռնիայի անդրանիկ լրագրում, «La Reforme»-ն տպագրվել է Թաթիկյան տպարանում։ Նրա պատասխանատուն մինչև 1874-ը վաճառական Խ. Աղազարյանն էր, Այն նախ շաբաթաթերթ էր, իսկ 1875-ի փետրվարից դարձավ եռօրյա։ Թերթում Ոսկանյանը տպագրել է հայ իրականությանը վերաբերող բազմաթիվ լուրեր. այն ունեցել է քաղաքական-իրադարձությունների լայն իրազեկություն, որ ցույց են տալիս դրանց արտատպություններն «Արշալույս արարատյանում» (1873, № 957, 1874, № 979, 1876, № 1033, 1879, № 1125 և այլն)։ Բացի այդ պարբերականից, 1870-ական թվականներին, Զմյուռնիայում հրատարակվում էր մի այլ հայերեն-ֆրանսերեն թերթ՝ «L'esprit du monde»-ն, որի խմբագիրն էր Գ. Ազճալյանը («Արշալույս արարատյան», 1874, № 994)։

2 Մ. Հ ա կ ո թ յ ա ն, «Արևմուտքի» նորահայտ համարը («Բանբեր Երևանի համալսարանի», 1971, № 1, էջ 148—167)։

3 Վ. Զ ա ռ գ ա ռ յ ա ն, Հիշատակարան, Հայ գաղութը և մամուլը Եվրոպայի մեջ, հ. Բ, № 13—14, Կահիրե, 1933, էջ 4։ «Արևելք», 1855, № 6, էջ 166—174։ «Արևմուտք», 1859, № 1, էջ 5—8, № 6, էջ 47—48։

4 «Արշալույս արարատյան», 1871, № 903, 904, 905, 1884, № 1336։

5 Նույն տեղում, 1872, № 941, 1879, № 1120—1122։

Հրանտի առաջին թղթակցության մեջ առաջադրվում են եկեղեցու բարոյական հեղինակությունը վերականգնելու խնդիրները: Հեղինակն այս առթիվ խիստ քննադատում է կրոնական ժողովները և եկեղեցու հայրերին՝ իրենց իշխանությունը չարարելու համար: Քահանայական պաշտոնները շռայլելու, «մոլի և հոռի վարուք նանչված» քահանային և տգետ քարոզչին հովանավորելու առթիվ հեղինակի սուր դիտողությունները բացահայտորեն հակադրվում են թերթի ավանդական դարձած չափավոր-զգույշ դիրքին: Ինչ վերաբերում է թղթակցության բարեպաշտական խորհրդածություններին, ապա նախ պետք է նկատի ունենալ, որ 70-ական թվականներին ավելի քան երեք, Ոսկանյանը ազդարհ-հասարակական որոշակի դեր էր հատկացնում կրոնին և այնուհետև, հենց այդ խորհրդածություններն են անցագիր ծառայել եկեղեցու հայրերի դեմ ուղղված հեղինակի քննադատության համար: Ի դեպ, Կ. Պոլսի «Հայրենիք» լրագրի Մ ստորագրող թղթակցին, ի տարբերություն «Արշալույս արարատյանի» պահպանողականների, ամենևին էլ չէին ողորդել հիշյալ կրոնասիրական մտքերը: Հրանտին նա ուղղակի մեղադրում էր «եկեղեցվո ռումունքներուն նկատմամբ վերանորոգության և կամ փոփոխության» հանցանքի մեջ, որ և հերքում է Հրանտը իր մի համառոտ թղթակցության մեջ⁶:

Հրանտի երկրորդ թղթակցության մեջ առաջարկվում է լուրջ ուշադրություն դարձնել կնոջ մտավոր զարգացմանը և ձգտել «իզական սեռը բարձր դիտությանց հաղորդ ընելու» իրավունքին: Այս նպատակով նա դիմում է Զմյուռնիայի «Հայ ընթերցատան» տնօրեններին՝ կանանց համար կազմակերպելու հրապարակային դասախոսություններ: Անկասկած, կնոջ մտավոր և բարոյական վերածննդի նկատմամբ այսպիսի հետևողականությունը խորթ անհերքաշնակություն էր մտցնում կնոջ հասարակական կոչման մասին թերթի ունեցած ընդհանուր հայեցակետի մեջ:

Հրանտի երրորդ թղթակցության գաղափարները՝ հայաբնակ քաղաքներում ամուսնությունների թվի նվազելու, կանանց կրթության և դաստիարակության նոր արժեքների յուրացման մասին, արևմուտքին կապվելու սովորությունը դատապարտելը և ընտանիքը որպես կնոջ դաստիարակության առաջին և հիմնական օրրան դիտելը լիովին համապատասխանում են «Արևմուտքի» էջերում Ստ. Ոսկանյանի՝ կանանց դաստիարակության վերաբերյալ հոդվածի գաղափարներին: Ուշագրավ է, որ այդ հոդվածում Ստ. Ոսկանյանը հայ կնոջը եվրոպական բարքերից հեռու պահելու նախանձախնդրությամբ ապավինում էր ազգային լավագույն ավանդույթներին՝ հայրենասիրությանն ու առաքինությանը: «Ձեզ օրինակ են,—դիմում է նա հայ կանանց,— Ծղիշին նկարագրած արի տիկիները և հետո օտարազգի պեպեկները»⁷: Դատապարտելով օտարամուտ հոռի բարքերը, Հրանտը գրեթե նույն կերպ է բնութագրում պճնասեր կանանց. «Արդ, եթե օրիորդները այսօրվան օրս մեյմեկ պեպեկ կնկատվին, ասոր համար ավելի ծնողք մեղադրանաց արժանի են»⁸: Ավելացնենք, որ և՛ Ստ. Ոսկանյանը, և՛ Հրանտը հայ կնոջը չեն ամփոփում զուտ ազգային դաստիարակության շրջանակներում. ընդհակառակն, «Արևմուտքի» այդ նույն հոդվածում Ստ. Ոսկանյանը առաջադրում է եվրոպացի կնոջ

⁶ Նույն տեղում, 1871, № 905:

⁷ «Արևմուտք», 1859, № 18, էջ 141 (այս և հետագա ընդգծումները բնագրային են—Ա. Խ.):

⁸ «Արշալույս արարատյան», 1871, № 905:

հոգևոր, բարոյական և մտավոր հարստություններին հաղորդակցվելու խնդիրը («Հայ կիներ, սկսենք նախ Եվրոպայի ազնիվ կիներու սիրտը, միտքը, վեհ զգայությունները ընդունիլ»)։ Հրանտը ևս իր լսարանին է հանձնարարում եվրոպական «ողջամիտ ու առաքինի» դաստիարակության սկզբունքներ պարունակող գրքերը։ «Արշալույս արարատյանում» Հրանտ ծածկանունը գործածելը հաստատուն է դառնում նաև այն հանգամանքով, որ նույն անվամբ, Ստ. Ոսկանյանը, ինչպես ասվեց, ստորագրել է իր պարբերականներում։

Անվերապահորեն նույնը շնք կարող ասել նշված եռաստղանիշով հոդվածների մասին, որովհետև ժամանակի հայ բազմաթիվ պարբերականներում և նույն «Արշալույս արարատյանում» կան այդպիսի ստորագրությամբ շատ հոդվածներ, որոնք, բնականաբար, ոչ մի առնչություն չունեն Ստ. Ոսկանյանի հետ։

Աստղակիր ստորագրությամբ առաջին հոդվածը, որ, մեր կարծիքով, պատկանում է Ստ. Ոսկանյանի գրչին, տպագրվել է թերթի 1872 թ. № 941-ում, «Դիտողություն մը» վերնագրով։ Հոդվածում շարադրված են հեղինակի լուսավորական ըմբռնումները, ինչպես և կոնկրետ ծրագիրը՝ զմյուռնահայ վարժարանների ուսումնա-կրթական զարգացումն ապահովելու համար։ Հեղինակի ինքնությունը բացահայտելու համար համեմատենք նշված հոդվածի դրույթները «Արշալույս արարատյանում» տպագրված «Ուսումնասեր» ընկերության հայտարարության հետ, որ տարիներ առաջ գրել էր Ստ. Ոսկանյանը⁹։ Ի դեպ, այդ հայտարարությունը մեզ հայտնի վերջին այն վավերագրերից է, որտեղ շարադրված են Ստ. Ոսկանյանի լուսավորական-մանկավարժական ըմբռնումները, ուստի և համեմատվող եզրերի միջև եղած խզումը, ժամանակի իմաստով, հասցված է նվազագույնի։ Այստեղ բնութագրելով լուսավորություն հասկացությունը և դրա խնդիրները, Ստ. Ոսկանյանը նշում է, թե «Լուսավորության նպատակը ուրիշ բան չկրնար սեպվիլ, եթե ոչ ազնիվ մարդիկ պատրաստել»։ Նույն բանաձևմանը, փոքր-ինչ ընդգծված հոմանիշներով, հանդիպում ենք «Դիտողություն մը» թղթակցության մեջ. «Եվ ի՞նչ է դպրոցը, բայց եթե մարդկությունը ազնվացնելու, վեհացնելու, ճոխացնելու և անոնց իր պարտավորությանց ծանոթացնելու միակ շարժառիթը» — գրում է եռաստղանիշ հեղինակը¹⁰։

Հայտարարությունը հրապարակելու միջոցներին Մեսրոպի և Սահակի տոնախմբության առթիվ կարդացած իր ատենախոսության մեջ Ստ. Ոսկանյանը «Ուսումնասեր» ընկերության հիմնական խնդիրներն էր համարում վարժարանների նյութական, մտավոր և բարոյական վիճակի բարելավումը։ Այլ կերպ ասած՝ նա պահանջում էր վարժարաններին արամադրվելիք դրամական կանոնավոր և բավարար հատկացումների փրականացում, որով ընկերությունը հիմնովին փոխելու էր հնացած մանկավարժական, կրթական համակարգն ու մեթոդը։ «Դիտողություն մը» հոդվածում ևս ամենակարևորն ու առաջնայինը համարվում են «այն ամեն կարգադրությունները, որք վարժարանին արդյունավետության շարժառիթներն են. այսինքն՝ վարժարանին ծախսը գոցող գումարի մը անհրաժեշտ ապահովիլը, գործունյա և բանիբուն դասատվաց քաջ ընտրություն մը, բեղմնավոր կանոնադրության մը անթերի գործադրություն և որ ամեննն նշանավորն է՝ դպրոցին ներքին կառավարությանց...»։

⁹ «Արշալույս արարատյան», 1866, № 772.

¹⁰ Նույն տեղում, 1872, № 941.

Ինչպես տեսնում ենք, այստեղ ևս առաջ են քաշվում նույն երեք գործոնները՝ նյութականը, մտավորը («գործունյա և բանիբուն դասատվաց քաջ ընտրութիւն մը») և բարոյականը (դպրոցի ներքին կառավարումը)։ Դպրոցական բարեկարգման այս երկու ծրագրերը բովանդակությամբ գրեթե չեն զանազանվում միմյանցից։ Տարբերությունն այն է միայն, որ ատենախոսության մեջ Ստ. Ոսկանյանը ամենայն խստությամբ մերժում էր զմյուռնահայ վարժարաններում արմատացած հնօրյա «տիրացուական» մտամարզանքները, իսկ այստեղ՝ «ապարդյուն վարժապետներին»։ Ինչ վերաբերում է մանկավարժական մեթոդներին, ապա եռաստղանիշ թղթակիցը հազիվ թե սկզբունքային առարկություններ ունենար, քանի որ վարժարանների տեսուչն այդ ժամանակ Մ. Մամուրյանն էր, որի մանկավարժական շնորհների մասին ակնածանքով է արտահայտվում հիշյալ հեղինակը։

Ժամանակին «Ուսումնասերի» ատենապետը սկզբունքային պայքար էր մղում զմյուռնահայ վարժարանների կանոնադրությունը ազդեցիկ այս կամ այն դրամատիկոզ քմահաճույքներով փոխարինելու սովորույթի դեմ։ Վերոհիշյալ ատենախոսության մեջ Ստ. Ոսկանյանը իր տհաճությունն էր հայտնում «մասնավոր անձերի խնամքից»։ Ծիշտ նույն ոգով «Դիտողություն մը» հոդվածի հեղինակը ցանկություն էր հայտնում, որ վարժարանների տեսուչը¹¹ «չէ թե այսինչ աղային կամ այնինչ էֆենտիին բացատրություններ տալու կամ անոնց քմաց համաձայն շարժելու պարտավոր ըլլա, հապա իր վարժարանին նկատմամբ ընդհանուր գործոց ցուցակը քաղաքական ժողովու կամ Ազգային վարչությունը ներկայացնող անձանց վրա»¹²։

«Արշալույս արարատյանի» նյութերի մանրազնին ուսումնասիրությունը ցույց է տալիս, որ Ղ. Պալազարյանի խմբագիր լինելու ամբողջ ժամանակամիջոցում¹³ (1840—1878) թերթը միայն երկու անգամ է հանդգնել վարժարանները աղաների ինքնիշխանությունից ազատելու առաջարկ անել. առաջինի հեղինակը, ինչպես տեսանք, Ստ. Ոսկանյանն էր, իսկ մյուսինը՝ եռաստղանիշ հեղինակը։ Եվ վերջապես, «Ուսումնասեր» ընկերության հայտարարությունը և «Դիտողություն մը» հոդվածը ավարտվում են գրեթե նույն կերպ, որ երկու հեղինակների մտահոգությունների ընդհանրությունից բացի, ցույց է տալիս նաև նրանց ոճի նույնությունը։ Իրենց մանկավարժական ըմբռնումներն ու ծրագրերը շարադրելուց հետո երկու հեղինակներն էլ հանկարծ կտրուկ թողնում են երևույթների վերլուծության հայեցողական ձևն ու անմիջականորեն դիմում հանրությանը. «Անմիջապես և կռիվը,— գրում է Ստ. Ոսկանյանը,— ձեր իյնալուն և ետ մնալուն պատճառ եղան. եթե հիմա միասիւս կամքով սուրբ Մեսրոպի տունը (ս. Մեսրոպյան վարժարանը— Ա. Խ.) ձեզ ասպարեզ ընտրեք և անկե ետքը տգիտության դեմ միայն կռիվ որոշեք, մի տարակուսիք, որ մեր ողորմելի հայրենիքը ձեզ երախտագետ պիտի ըլլա։ Ազգի մը առաջին պարծանքը միտքի արդյունքներ են»¹⁴։

11 Ձմյուռնիայի Մեսրոպյան և Հովհաննիսյան վարժարաններն ունեին միևնույն տեսչությունը։

12 «Արշալույս արարատյան», 1872, № 941։

13 Ղ. Պալազարյանի մահից հետո շուրջ մեկ տարի թերթի խմբագիրն էր Տ. Սավալանյանը (1878 ապրիլ-մայիս—1879 ապրիլ), որին թերթի № 1118-ից սկսած փոխարինում է Հ. Սվաճյանը (1879-ի մայիսից)՝ «Մասիս», 1879, № 2349։

14 «Արշալույս արարատյան», 1866, № 772։

«Դիտողություն մը» հոդվածի հեղինակը իր հերթին գրում է. «Ամեն ոք կ'իմասի, ամեն ոք կ'ընեն ուզածին պես, բայց մի գողաք, մի գողնաք, գողում-գողումով ձեռք ճակատակին չպիտի հասնիք երբեք, հասնիք ձեռք-ձեռքի տալով աշխատեցեք դարձան տանելու իրաց վիճակին, քանի որ կ'սպասեք ավելի ընտիր սերունդ պատրաստելու ազգին»¹⁵:

Ինչպես տեսնում ենք, երկու դեպքում էլ կոչ է արվում ժողովրդին՝ թողնել տարածաշրջանները և համախմբվել հանուն ազգային լուսավորության: Ազգային լուսավորությունը համարվում է ժողովրդի առաջնային նպատակը: Կարծում ենք, որ այս ընդհանրությունները վկայում են եռաստղանիշ թղթակցի՝ Ստ. Ոսկանյանը լինելու իրողությունը: Ստ. Ոսկանյանի հեղինակության արդյունք պետք է համարել նաև նույնպիսի եռաստղանիշ ստորագրությամբ «Արշալույս արարատյանում» տպագրված «Դպրոցական բարվոքում» հոդվածը¹⁶: Հեղինակն այս անգամ ևս առաջադրում է ժամանակակից պահանջներին համապատասխան նորոգյա դասացանկի և արժանավոր ուսուցիչների խնդիրը: Այս և Ստ. Ոսկանյանի՝ մեր արդեն քննարկած հոդվածների բովանդակության ընդհանրությունը նշելով հանդերձ, նկատենք, որ այստեղ առավել հետաքրքիր են այլ հանգամանքներ: Ինչպես հայտնի է, Կոստանդյանին հերքող իր գրքովները Ոսկանյանը գրել էր ֆրանսերեն, որոնք մատչելի չէին ընթերցողների լայն շրջաններին: Ուրեմն, եթե Ոսկանյանը չէր թարգմանելու, ապա համեմատյալ դեպք, մայրենի լեզվով այս կամ այն կերպ պետք է անդրադառնար դրանց, քանի որ այդ գրքովները փաստորեն նախատեսված էին հայ լսարանի համար: Հիշենք, որ 1878-ին Ոսկանյանին հայերենով ելույթի էին հորդորում և՛ «Արշալույս արարատյանի» պահպանողականները, և՛ Զմյուռնիայի լատին համայնքի հոգևոր պետը՝ արքեպ. Սպակապիետրան՝ ժողովրդին «անկրոնության» դեմ յուրովի պատվաստ անելու համար¹⁷:

Իսկապես, հենց նույն ժամանակներում էր, որ «Արշալույս արարատյանը» տպագրել է «Դպրոցական բարվոքում» հոդվածը, որտեղ հեղինակը Ոսկանյանի ոճով մարտնչում է Գ. Կոստանդյանի դեմ: «Իմաստակները, — գրում է նա, — երբեմն կճառեն, նաև կգրեն, ուրիշ իմաստակներ կհիանան, ասոնց ամենուն ալ նպատակը գրեթե միօրինակ է՝ ժողովրդային հին դրությունները չեն հավնիր, կթշնամանեն զանոնք և նոր հավատք ու նոր կրոն կբարոզեն՝ ցուցունելու համար, թե միլիոնավոր մարդերն բազկացյալ ազգի մը հառաջադիմության միջոցներն իրենք միայն գիտեն, առանց գիտնալու սակայն իրենց քարոզի շահին ու աստիճանը: Իմաստակին համար ամենադյուրին գործ մ' է ամբողջ ազգի մը նազովրեցիին գիրքեն հեռանալով Օկյուսթ Գոնթի կամ ուրիշ ավելի մեծ վիլիսոփայի մը դրության դավանիլը, առանց սակայն խորհելու, որ Հիսուսի օրենքը հառաջադիմության արգելք մը չըլլալի զատ՝ լուսավորության օժանդակ է... Ապացույց մեր ըսածին՝ քրիստոնեության հետ

¹⁵ Նույն տեղում, 1872, № 941 (ընդգծումները մերն են—Ա. Խ.):

¹⁶ Նույն տեղում, 1879, № 1120—1122:

¹⁷ Նույն տեղում, 1878, № 1103 և 1108: Այնքան մեծ էր Գ. Կոստանդյանի դրբի առաջացրած իրարանցումը Զմյուռնիայի պահպանողական շրջաններում, որ 1878-ի աշնանը հայ համայնքի կրոնական ժողովը մի քանի նիստեր է նվիրել այդ հարցին. ի վերջո, այդ ժողովի նախագահ Մելքիսեդեկ Մուրատյանը հանգստացրել է կրքերը, նկատելով թե եզրան կարևորություն պետք չէ տալ (նույն տեղում, № 1108):

խղճի ազատության կրոնը պաշտող եվրոպական ազգեր, որոնց մեջ կգտնվին իմաստակաց աչքը շլացնող Օկյուսթ Գոնթ՝ փիլիսոփայից թզուկը և Քանդ, Նեվթն, Վոլթեր՝ փիլիսոփայից հսկայները»¹⁸:

Ընդարձակ այս մեջբերումը ուշագրավ է երկու առումով. նախ նկատենք, որ հակառակ թերթի պահպանողականների, որոնց ելույթները Կոստանդյանի դեմ սոսկ հայհոյական հարձակումներ են և անզուսպ զայրույթի արդյունք, եռաստղանիշով ստորագրողը հիմնավորում է իր ընդդիմախոսությունը, ընդ որում, քաղաքակրթության առաջընթացին նպաստող կրոնի դերի ընդգծումով, ճիշտ նույն հայեցակետը, ինչ տեսնում ենք Ոսկանյանի «Օկյուսթ Գոնթը Զմյուռնիայում և անաստվածություն» գրքուկում¹⁹:

Այնուհետև, առկա է թղթակցի մեծ ակնածանքը Կանտի նկատմամբ, որ նա չի թաքցնում նաև քիչ անց. «Ստույգ է,— գրում է նա,— թե Գերմանիայի՝ Գաղղիո դեմ տարած հաղթանակը Քանդի ուսերուն վրա կփայլի»²⁰: XIX դ. արևմտահայ հրապարակախոսներից Կանտին այսպես անվերապահորեն մեծարել է միայն Ստ. Ոսկանյանը և այն էլ՝ սկսած 1850-ական թվականներից: Եռաստղանիշ ստորագրությամբ թղթակցության հեղինակից դեռևս 20 տարի առաջ, հերքելով իրեն կոմունիստ համարելը, նա գրում է. «Քանթի աշակերտ մը (նկատի ունի իրեն— Ա. Ն.) Քապեին սին դրությունը չկրնար ընդունիլ երբեք»²¹:

Մի քանի տարի անց Ոսկանյանը կրկնում էր՝ «Քանդը կդավանենք միշտ փիլիսոփայներու փիլիսոփա»²², իսկ «Օկյուսթ Գոնթը Զմյուռնիայում և անաստվածություն» գրքուկում ուղղակի նշում է, թե «Կանտը գերմանական փիլիսոփայության հիմնադիրն ու ժամանակակից առաջին մտածողն է»²³:

Եռաստղանիշ ստորագրությամբ թղթակցությունները Ոսկանյանի հեղինակությունը լինելու փաստն է վկայում նաև հետևյալը. դեռևս 50-ական թվականներին վճռականորեն ժխտելով ազգը հյուսիսում դավանական ներհակությունները, Ոսկանյանը նկատում էր, որ ի հակադրություն արևելքի, քաղաքակրթության ավելի բարձր աստիճանի հասած արևմուտքը վաղուց ի վեր մերժել է կրոնական կռիվները՝ ապավինելով լուսավորությանը. «Թե արևմտյան ժողովուրդները կրոնական կռիվներ չհրաժարեին և դարերով արյուն թափելե ետև չհամոզվեին, որ անկե ոչ բարոյական, և ոչ նյութական բարօրություն մը կրնա ծագիլ երբեք, հիմա ի՞նչ տարբերություն կունենար Եվրոպա՝ Ասիայեն»²⁴,— գրում էր նա:

18 Նույն տեղում, 1879, № 1122:

19 Մ. Հ ա կ ո բ յ ա ն, Գալուստ Կոստանդյանը, Ստեփան Ոսկանյանը և էմիլ Լիթրեն («Քանթի Հայաստանի արխիվներ», 1971, № 1, էջ 138):

20 «Արշալույս արարատյան», 1879, № 1122:

21 «Արևմուտք», 1859, № 17, էջ 130:

22 «Արշալույս արարատյան», 1866, № 782: Այս դարձվածից հետո Ոսկանյանը անմիջապես ավելացնում է. «Բայց կտեսնենք, որ իր վահանը քիչ մը ծակված է և տգիտության դեմ ծակված վահան գործածել մեծ խոհմություն չթվիր մեզ»։ Այս հավելումը ամենևին էլ չի բացառում Ոսկանյանի՝ Կանտին, որպես փիլիսոփայի երկրպագելու՝ Պարդապես Ոսկանյանը կարծում է, որ Կանտի հայեցողական իդեալիզմը չի հարմարվում «Ուսումնասիրել» գործնական ջանքերին, Եվ Ոսկանյանը հենց այդպես էլ բացատրում է իր վերապահումը. «Ենչու՞. վասնզի՞ այսօր ուսումնասիրության և ազգաբնակչության վրա հիմնված ընկերություն մը («Ուսումնասիրել»—Ա. Ն.) սեզմե կ'սնդրե, որ գործադրության ձեռք զարնեմք և արդյունք ցույց տանք»:

23 Մ. Հ ա կ ո բ յ ա ն, նշվ. աշխ., էջ 139:

24 «Արևմուտք», 1859, № 2, էջ 12:

«Դպրոցական բարվոքում» հոգվածում իր հերթին թղթակիցը կրկնում է նույն միտքը. «Դարավոր փորձեր կապացուցանեն, որ իմաստակությունը ազգեր և ժողովուրդներ փճացուցած է, կրոնի փրկիսփայտության անհասկացողությունը Ավարայրի դաշտը արյամբ ոռոգեց: Ս. Պետրոսի՝ Հռոմի մեջ հաստատած աթոռին զաղափարը, որ քրիստոնեության հետ առնչություն մի չունի, պապական անսխալությունը հետևեցուց... կրոնական խստություններ պատճառեց, հավատաքննության դուռեր բացավ, Լուտեր մը ծնավ, որ հանուն կրոնի ազգերը բաժնեց»²⁵:

Այսպիսով, եթե «Արևմուտքում» Ոսկանյանը թուցիկ նշում և դատապարտում էր արևմուտքի ժողովուրդների կրոնական վաղեմի կեիվները, ապա «Արշալույս արարատյանում» եռաստղանիշ թղթակիցը մատնացույց էր անում այդ կեիվների շարադետ հետևանքները: Այնուհետև վերջինս պարսից նվաճողական քաղաքականության կրոնական միտումները դատապարտում է հենց միևնույն հայեցակետից, ինչ Ոսկանյանը՝ արևմուտքի կրոնական կեիվները:

Եռաստղանիշ հեղինակը անդրադառնում է 1866—1868 թթ. Ոսկանյանի գլխավորած «Ուսումնասեր» ընկերությանը. «1866-ին,—գրում է նա,— «Ուսումնասեր» ընկերություն մը հաստատվեցավ, որ առաջին անգամ վարժարանաց բարվոքման և գիտության ծավալումի համար դրամական պիտոյից խնդիր հղացավ, բայց առանց ծնելու մեռավ՝ լուսո անհաշտ թշնամիներու հարվածին վիրավորվելով»²⁶: Անտարակույս, «Ուսումնասերի» մասին խորհրդածություններ կարող էր անել ոչ միայն Ոսկանյանը: Սակայն այդ ընկերության մեծարումը, դառնության շքողված տրամադրությունները՝ «Ուսումնասերի» չիրականացած հնարավորությունների մասին, իրավունք են տալիս մի անգամ ևս նկատելու, որ վերհուշի հեղինակը ինքը՝ Ոսկանյանն էր: Ի նպաստ եռաստղանիշի՝ Ոսկանյանը լինելու մեր համոզմունքի, պետք է նկատել, որ այդ հրապարակախոսը տալիս էր առաջ ևս առիթ էր ունեցել հանձնվելու ճիշտ նույնպիսի դառն խորհրդածությունների: 1859-ի սկզբներին հայտնելով հետադիմականների ձեռքով փարիզում ծրագրվելիք «Արարատյան» ընկերության ձախողման մասին, նա գրում էր. «Այո, մեր ընկերությունը չձեռք մեռավ»²⁷: «Ուսումնասեր» ընկերությունը... առանց ծնելու մեռավ»,— գրեթե բառացիորեն այստեղ կրկնում է նրան եռաստղանիշ թղթակիցը:

Առհասարակ, 70-ական թվականներին և՛ Հրանտը, և՛ եռաստղանիշ ստորագրությամբ նամակների հեղինակը հիմնականում իրենց մտորումները կենտրոնացնում են ազգային լուսավորության և կրթության խնդրի վրա, խնդիր, որ մշտապես զբաղեցրել է Ոսկանյանին:

²⁵ «Արշալույս արարատյան», 1879, № 1122.

²⁶ Նույն տեղում, № 1120.

²⁷ «Արևմուտք», 1859, № 20, էջ 155.

²⁸ Նկատի առնելով զմյուսնահայ լուսավորական շարժումների մասին մեր հոգվածը («Բան-րեր Հայաստանի արխիվներին», 1972, № 1, էջ 227—236), Մ. Հակոբյանն առանց որևէ փաստ մատնացույց անելու, մեզ մեղադրում է «սխալ մեկնաբանումների և աղավաղումների մեջ», ավելացնելով, թե դրանց ինքը բանդրադարձել է առանձին («Լրագրեր», 1972, № 9, էջ 21): Թե որտեղ և ե՞րբ՝ Հակոբյանը չի նշում իր աղբյուրը և չէր էլ կարող, որովհետև այդպիսին գոյություն չունի:

Նոսաստղանիշով նամակների հեղինակը, իսկապես, առաջադիմական հայացքներ ունի ազգային կրթության նպատակների, բովանդակության վերաբերյալ, ընդգծում է դրական գիտությունների և գործնական ուսուցման նշանակությունը վարժարաններում, քննադատում է գոսացած մանկավարժական մեթոդները, որ հազիվ թե հաճույք պատճառեր պահպանողականներին։ Այսպես, այդ թղթակիցը ծաղր ու ծանակի էր ենթարկում հին դպրոցի ծրագիրը, «այսինքն՝ հայկաբանություն, քիչ մը թվաբանություն, աշխարհագրության թափփուր, կես մը ազգային պատմություն, քրիստոնեական վարդապետություն, կտոր մը լեզվագիտություն և գլխավորապես տիրացություն»²⁹։ Քննադատությունն այստեղ արվում է ճիշտ նույն ոգով, որով հագեցած էին Ոսկանյանի աստեղանիշով թղթները 1866-ի գարնանը՝ զմյուռնահայ դպրոցների «իմաստակ ուսման մասին»³⁰։

Օրպել ստորագրությամբ Ստ. Ոսկանյանի հոդվածներն «Արշալույս արարատյանի» էջերում³¹ օգնում են բացահայտելու նրա մի այլ ծածկանունը։ Օրպելին բնորոշ գրելաձևը և հասարակական հետաքրքրությունների միևնույն շրջանակն ունի թերթի Սուրեն անվամբ թղթակիցը³²։ Իր առաջին թղթակցության մեջ նա գոհունակություն է արտահայտում թերթի վերահրատարակման առթիվ։ «Անսալթաք հարատևություն» մաղթելով «Արշալույսին», Սուրենը դրում է. «Ձեր (Հ. Սվաճյանի— Ա. Խ.) ներողամտությունը կխնդրեմ, եթե երբեք իմ դրությունները պարունակած են կետեր «Արշալույսի» դադարման տեղի տալու, իրավ է, որ այդ պարագայի մեջ կրնայիք հայտնել իմ անուն և աղատել պատիժե, բայց... դուք օրենքին ձեռքի տված ամեն իրավանց անխրտի պահանջողներն չեք»³³։

Ինչպես տեսնում ենք, Սուրենը կասկածում է, որ իր գրություններն են եղել «Արշալույս արարատյանի» խափանման պատճառը³⁴։ Ցավոք, մեր տրամադրության տակ չկան թերթի այդ շրջանի համարները, ուստի ստիպված ենք բավարարվել երկու ենթադրությամբ. կամ Սուրենի խափանառիթ հոդվածը գտնվում է այդ պակասող համարների մեջ կամ էլ այդ հեղինակը առաջին անգամ է հանդես գալիս Սուրեն անվամբ (1884-ի № 1287-ում), բայց դրանից առաջ տպագրվել է մի այլ ծածկանունով։ Այս տեսակետից մոտենալով խնդրին, շատ հավանական է, որ այդ շրջանում թերթի դադարման պատճառ կարող էին լինել նաև Օրպելի թղթակցությունները, որոնք խիստ քննադատության են ենթարկում արևմտահայ հետադիմությանը, մասնավորապես Կ. Պոլսի երեսփոխանական ժողովի գործունեությունը։ Կարևոր է նաև այն, որ անգամ խմբագիր Հ. Սվաճյանը հեռու էր բացասման ու քննադատության այնպիսի պաթոսից, ինչ հատուկ էր Օրպելի հիշյալ թղթակցություններին։ Ամենայն հավանականությամբ, հակառակորդները ըմբռնել են այդ թղթակցությունների վտանգը։ Օրպելի վերջին նամակը ավարտվում է «Շարն ընդ

29 «Արշալույս արարատյան», 1879, № 1120։

30 Նույն տեղում, 1866, № 772, 783։

31 Նույն տեղում, 1883, № 1225, 1227, 1230, 1234, 1235, 1237։

32 Նույն տեղում, 1884, № 1287, 1303, 1304, 1329, 1339։

33 Նույն տեղում, № 1287։

34 Թերթի լրիվ հավաքածուն մեր ձեռքի տակ չլինելու պատճառով հնարավոր չեղավ որոշել այդ դադարման ճշգրիտ ժամանակը, սակայն պարզեցինք, որ այն չի հրատարակվել շուրջ մեկ շաբաթ՝ 1884-ի մարտի 1—մայիսի 26-ի հատվածում։

հուլայ»³⁵ խոստովանով, բայց շարունակությունը թերթի հաջորդ համարներում չկա:

Թերթում տպագրված իր երկրորդ նամակում Օրպելը սուր հարձակումներ գործելով Կ. Պոլսի Ազգային ժողովի վրա, ծանակում է ներսես պատրիարքի հակառակորդներ Ստ. Փափազյանին, Հ. Ալաճաճյանին և Ա. Սուրենյանին, «Ղալաթի ոճախ» կոչված «կուսակցությանը»: Օրպելը շեշտը դնում է վերջինի բնութագրական մի գծի՝ երեսպաշտության վրա. «... Ազգային շահերու և աղքատին իրավանց պաշտպան... այս մարդիկ, — հեգնում է նա, — ո՛չ ամչցած են, և ո՛չ խպնած և ամեն նշաններե կերևի, որ ասկեց ետքն ալ ո՛չ ամչնալիք ունին և ո՛չ խպնելիք...»³⁶: Իր հերթին Սուրենը քողազերծում էր «օճախի» երեսփոխաններին, որոնք «խոսում են ուսմիկ ժողովրդյան դուրազագծությունը գրգռելու եղանակով» և կամ՝ «իբրև ժողովրդային փալլիկ կնկրտին», այսինքն՝ բացահայտում է «օճախի» հասարակական նույն վարքագիծը՝ կեղծավորությունը, ինչ Օրպելը³⁷:

Նույն խմբակցության մարդկանց Օրպելն անվանում է «անօրինակ թափփուլներ», որոնց դեմ «ժողովրդային դժգոհության ցույցեր, լրագրերու հրատարակություններ և կշտամբանք... արդյո՞ք փոքր-ինչ ազդեցություն պիտի գործեն այդ ինքնակոչ անձնվերներու վրա... քալ լիցի, և ես տարակույս չունիմ, որ... վերջը հետինն չար, քան զառաջինն պիտի ըլլա»³⁸:

Ազգային ժողովն այս մարդկանցից մաքրելու հնարավորությունը հար և նման թերահավատությամբ էր վերաբերվում նաև Սուրենը, նկատելով, թե նրանց «Ազգը հավիտյան իր գործոց մեջ պաշտոնյա տեսնելու դժբախտությունն ունի»³⁹:

«Մեր արդի վիճակը» վերնագրով թղթակցության մեջ Օրպելը ազգային քաղաքական տխուր իրականության պատճառներից է համարում «օտարին շարկամությունը», հայ կղերի անկյալ վիճակը՝ «ամհամերձ էջմիածինը», Ծրուսաղեմի պարտքը, և վերջապես Սիսը, որը Կ. Պոլսի «շահասեր անձների» աջակցությամբ դարձել էր «ողորմելի ասպարեզ գողոզ փառասիրության, առիթ հերձվածի»⁴⁰:

Ազգային-հասարակական անցուդարձի մասին խորհրդածող Սուրենը, ևս քննարկում է նույն խնդիրները և հանգում գրեթե բառացիորեն նույն եզրակացության. «Ազգը տարբեր երկիրներու մեջ ցրված, մեկ կողմեն օտարին քաղաքական դավերը, մյուս կողմեն անարժան կրոնավորները, ասդին Սիսի կաթողիկոսը, անդին արժաթապաշտ պաշտոնյաները կսպառնան հերձվածի բաժնելու զայն»⁴¹:

Երկու հրապարակախոսներն էլ չափազանց հիվանդագին էին զգում հետադիմության մշտական շնչառությունն իրենց թիկունքին, գրչի կաշկանդված վիճակը: «Ավելի լուելու ժամանակ է, քան գրելու, եթե չես ուզեր վնասվիլ», — գանգատվում էր Օրպելը⁴², «լավագույն եղանակ է՝ փոքր-ինչ մեղմել

35 «Արշալույս արարատյան», 1883, № 1237:

36 Նույն տեղում, 1883, № 1227:

37 Նույն տեղում, 1884, № 1339:

38 Նույն տեղում, 1883, № 1227:

39 Նույն տեղում, 1884, № 1304:

40 Նույն տեղում, 1883, № 1230:

41 Նույն տեղում, 1884, № 1303:

42 Նույն տեղում, 1883, № 1225:

լեզու և բերան»⁴³, «հոհեմություն է այժմ լուռություն պահել»⁴⁴, «Պետք է լռել՝ բարոյական հաղթության կամարին ներքև կանգ առնելով», քանիցս երկրորդում է նրան Սուրենը⁴⁵:

Խոնարհվելով աղատ խոսքի բարոյական մեծ նշանակության առջև, Օրպելը ցավով նշում է, որ իրականության մեջ այն շնչին ուժ է նյութականի, առարկայականի համեմատությամբ. «Իրավ է, որ նյութական ծառայությունները միշտ սիրով և շնորհակալությամբ կընդունվին, բայց ո՞ւր գտնելու է այդ անիրավ նյութը, որ միշտ պաշտված տեղը կդիմե և որով միայն կարելի է նյութապաշտ ժողովուրդի մը սանձ դնել... Խոսելու և դրելու համար ալ դարձյալ այն անիրավության (նյութին հասկցիր) կկարոտինք»⁴⁶, — գրում է նա: Բարոյականության և նյութի նույնպիսի հակադրությունն ենք գտնում նաև Սուրենի մտորումներում՝ «նպատակ մը պաշտպանել՝ չկրնար դատապարտելի լինել, բավական է, որ ուղիղ սկզբունք մ' ունենա իրեն հիմ և ոչ թե նյութ... Դժբախտաբար, կան անձեր, որ ավելի նյութին՝ իրեն կհարին, քան թե անոր ներքին արժեքին և անոր բարոյական հարգին ու օգտակարության»⁴⁷:

Նյութամոլության բերած ավերումների դեմ ժամանակին նույնպիսի կրքոտությամբ էր ծառանում նաև Ստ. Ոսկանյանը. «Նյութամոլ կյանքի հետեանքները այնպիսի ապականություն մը ծավալեր են հիմա, որ վտանգի զանդակը հնչելու ժամը եկած կսեպենք», — գրում է նա և քիչ անց կրկնում՝ «Նյութամոլ կյանքի վայելքը կտանի հանքանություն»⁴⁸:

Սուրենի և Օրպելի հայացքների համեմատությունը ցույց է տալիս, որ երկու թղթակիցներն էլ քննադատում են վերնախավի շահերը պաշտպանող երեսփոխաններին, կղերի անկյալ վիճակը, ցարիզմի և Թուրքիայի ազգային շնչումները և «Պոլոսենիեն», ջերմորեն պաշտպանում են Ն. Վարժապետյան պատրիարքին, կողմնակից են արևմտահայերի «կեդրոնացման» սկզբունքին (գավառի բարոյական ենթարկվածությունը կենտրոնին), այլև ազգի տարանջատ հատվածների բարոյական-հոգևոր միասնությանը: Եվ վերջապես, այս թղթակիցներին միավորում է հրապարակախոսական միևնույն թեման՝ բացառապես արևմտահայ հասարակական կյանքը: Ուստի, Օրպելի և Սուրենի (որ նույնն է՝ Ստ. Ոսկանյանի) այս հոգվածները թեմատիկ-գաղափարական տեսակետից պետք է դիտել իբրև միասնական մի ամբողջություն:

Սուրենի՝ Ստ. Ոսկանյանը լինելու օգտին է խոսում նաև Հրանտի անակրնկալ հայտնությունը «Արշալույսի» էջերում⁴⁹: Այս ծածկանունը, որ Ոսկանյանը շէր գործածել այդ թերթում 1871-ից ի վեր, իր հերթին ևս լույս է սփռում խնդրի վրա: Իր նախավերջին հոգվածում Սուրենը քննարկում է պատրիարքական և կաթողիկոսական ընտրությունները և այս կապակցությամբ քննադատում Մամուրյանին, որը պայքարում էր ներսևսի թեկնածու-

⁴³ Նույն տեղում, 1884, № 1303:

⁴⁴ Նույն տեղում, № 1287:

⁴⁵ Նույն տեղում, № 1303:

⁴⁶ Նույն տեղում, 1883, № 1225:

⁴⁷ Նույն տեղում, 1884, № 1339:

⁴⁸ «Արևմուտք», 1859, № 18, էջ 141:

⁴⁹ «Արշալույս արարատյան», 1884, № 1336:

թյան դեմ: Նա պաշտպանում է Ներսեսի շարունակական հրաժարականները և դրանք բացատրում նրա առողջական վիճակով⁵⁰:

Հրանտի նամակը սկսվում է Կ. Պոլսի նոր պատրիարք ընտրելու իրա-
րանցման, խմբակցությունների պայքարի և թեկնածուների մասին տեղեկու-
թյուններով: Սուրենի նամակի և Հրանտի թղթակցության համադրումը ցույց
է տալիս, որ վերջինը առաջինի օրգանական շարունակությունն է արևմտա-
հայ կյանքում զարգացող իրադարձությունները պատկերելու տեսակետից:

Ուշագրավ է նաև, որ և՛ Օրպելը, և՛ Սուրենը շատ ջերմ վերաբերմունք
ունեն «Արշալույսի» նկատմամբ, այնպիսի նախանձախնդրություն, որ կարող
էր ունենալ միայն թերթի ճակատագրով ապրող գործիչը: Թերթի թղթակից-
ներից և ոչ մեկը այդքան սրտամոտ չի ընդունել զմյուռնահայ հետադիմու-
թյան բռնացումները առաջադիմական պարբերականի հանդեպ: Իր առաջին
թղթակցության մեջ Օրպելը վրդովմունքով էր նշում «պատգամներու ու սպառ-
նալիքներու»⁵¹ օգտագործումը հետադիմության կողմից, իսկ Սուրենը, ինչպես
տեսանք, ցնծություն էր արտահայտում թերթի վերահրատարակման առթիվ
կամ դատափետում նրա հրաժարված բաժանորդներին⁵² և կամ էլ՝ ողջունում
թերթի հասարակական ուղղությունը⁵³:

Առհասարակ, ոչ միայն ընդհանրության, այլև մանրամասների մեջ այս
զուգահեռ հրապարակախոսների նմանությունը իրավունք է տալիս պնդելու, որ
Սուրենը նույն ինքը՝ Օրպելն է, նույն ինքը՝ Ստ. Ոսկանյանը:

Մի հանգամանք ևս. Սուրենի՝ Կ. Պոլսից գրելու ձևը ամենևին չի նշանա-
կում, որ նա իրոք «Արշալույսի»՝ Կ. Պոլսի թղթակիցն է: Մեր համոզմամբ,
դա զուտ մի միջոց էր՝ թելադրված թերթի անվտանգության մտահոգությամբ:
Իր ելույթներում Ջմյուռնիայի գավառական ժողովը ծանակող Սուրենը փաս-
տորեն քննադատում էր նաև Մելքիսեդեկին՝ Ջմյուռնիայի առաջնորդին: Այս
պայմաններում փոխելով իր հասցեն (ինչպես և Օրպել անունը), Ոսկանյանը
շեղում էր հակառակորդների ուշադրությունն «Արշալույսից» և իր՝ պոլսեցի
անհայտ թղթակցի վրա հրավիրում նրանց ցասումը:

Ջմյուռնահայ ժամանակակից, այլև անցյալի իրականության մասին
գրելիս Սուրենը հանդես էր բերում այնպիսի իմացություն և քաջատեղյակու-
թյուն, որ ինքնին ապացուցում է նրա համաքաղաքացի լինելը: Այսպես,
Սուրենը շատ լավ գիտե, որ Ջմյուռնիայի հետադիմականների դրամամբ ու-
րող բաժանորդներ հրաժարվել են թերթից⁵⁴, գիտե նաև դրա պատճառները,
թեև թերթը ոչ մի լուր չի տպագրել այդ մասին: Սուրենը ծաղր ու ծանակի է
ենթարկում Ջմյուռնիայի երեսփոխանական ժողովի նիստերը, ընդ որում,
հատկանշական այնպիսի մանրամասներով, որ կարող էր անել միայն
զմյուռնաբնակը⁵⁵: Նա ծանրանում է 1873-ին Ջմյուռնիայում բորբոքված ե-
դեսյան և հակեդեսյան պայքարի դրվագների վրա, ցույց է տալիս Զիլինկիր-
յանի անսկզբունքայնությունն այդ հարցում⁵⁶: Միաժամանակ, նա սուր քննա-

50 Նույն տեղում, № 1329:

51 Նույն տեղում, 1883, № 1225:

52 Նույն տեղում, 1884, № 1303:

53 Նույն տեղում, № 1339:

54 Նույն տեղում, № 1303:

55 Նույն տեղում, № 1304:

56 Նույն տեղում, № 1329:

դատության է ենթարկում Չիլինկիրյանին և Մամուրյանին՝ դեմոկրատական ուղուց շեղվելու և Զմյուռնիայի վերնախավին մերձենալու համար⁵⁷ և դրանով իսկ շարունակում է իր բանավեճը նրանց հետ, որ ծայր էր առել դեռևս 1866-ից, Զմյուռնահայ իրականության և գործիչների հանդեպ այսպիսի դիրքորոշում կարող էր գրավել միայն Ստ. Ոսկանյանը, եթե նույնիսկ մի պահ ընդունելու լինեինք, որ թերթի պոլսարևակ թղթակիցը զմյուռնացի չէր, լինելով «Արշալույս արարատյանի» մերձավոր աշխատակիցը, Ստ. Ոսկանյանը, ամենայն հավանականությամբ, աշխատակցել է նրան նաև հետագայում՝ րնդհուպ մինչև թերթի փակումը՝ 1887 թ.։ Ցավոք, մեր տրամադրության տակ չկան թերթի 1885—1887 թթ. հավաքածուները, որպեսզի խորամուխ լինենք քննարկվող հարցին։

Նշած փաստերն առայժմ իրավունք են տալիս եզրակացնելու, որ Ստ. Ոսկանյանը «Արշալույս արարատյանում» ևս, ինչպես իր պարբերականներում, 1871—1884 թթ. օգտագործել է Հրանա ծածկանունը և ստորագրության ևռաստղանիշ ձևը։ 1884-ից Ստ. Ոսկանյանը նույն թերթում հանդես է եկել Սուրեն ծածկանունով։ Բացի այդ՝ Ստ. Ոսկանյանը «Արշալույս արարատյանին» աշխատակցել է ավելի վաղ (1871 թ.) ժամանակից, քան հայտնի էր ցայժմ։

ПСЕВДОНИМЫ СТЕПАНА ВОСКАНЯНА В ГАЗЕТЕ «АРШАЛУЙС АРАРАТЯН»

А. А. ХАРАТЯН

Резюме

Начиная с 1871 г. знаменитый армянский публицист С. Восканян выступал со статьями в газете «Аршалуйс араратян» (Турция, Смирна).

В 1871—1884 гг. С. Восканян пользовался псевдонимами Грант, Суфен, а также подписывался под своими статьями тремя звездочками.

Таким образом, выявляются до сих пор неизвестные статьи С. Восканяна, которые освещают его деятельность в 1871—1884 гг.

⁵⁷ Նույն տեղում, № 1329 և 1339։